

Innspel til sak Eikanger skule

I august 2016 vart prosjekt "ny felles skule" oppretta med absolutte lovnader om ein god og grundig gjennomgang med involverande prosessar, med ny skule i sikte innan få år. Etter ca 15 år med arbeid i skulegruppe på Eikanger, fekk endeleg saka gode rammer og eit konkret mål med ein god plan for ny skule. Dei siste månadane har det vore stille, og vi ser at vi no er på veg i ein ny prosess kor alle planar og konkrete mål vert lagt til side utan at dette på nokon måte er forankra i verken brukargruppa eller andre organ knytt til skulen. Det er med stor uro vi les rådmannen si innstilling til vedtak, då vi ser at rådmannen sin konklusjon byggjer på eit svært unyansert og mangelfullt bilde av dagens situasjon for elevar og tilsette ved Eikanger skule.

De som skuleeigarar har dei siste åra tatt ansvar for at dei aller fleste skuleborna i Lindås har fått, eller snart får nye skulebygg. Prinsippet om å skapa likeverdige og gode læringsmiljø vert med dette forslaget sett til side, og vi meiner at skuleeigar dermed ikkje ivaretek Eikanger-elevane sine rettar til eit godt skulemiljø. I påvente, og med konkrete lovnader om ny skule, har både elevar, tilsette, foreldre og skuleeigar i mange år sett "gjennom fingrane" med fleire sider av skuleanlegget. Dette gjeld tilhøve knytt til tryggleik og sider som handlar om å i det heile ha høve til å gje elevane den undervisninga dei har krav på etter læreplanen. Dette kan vi ikkje lenger godta.

Rådmannen viser til behov som skal kunna dekkjast med ei kostnadsramme på 11 millionar. Dette kjenner vi oss ikkje igjen i, og vi veit at dette er ei grov undervurdering av dei faktiske behov. Følgjande behov er avgjerande å få på plass, og vil verta eit krav frå FAU/SU dersom bygging av ny skule no vert lagt på is:

*Tilkomst/parkering og drop-sone må på plass. Dette er i dag forbunde med stor fare. *Gymsal med lagringsplass for gymutstyr *Garderobar m/toalett, både for gymsal og større garderobar for elevane *Lagerrom	*Spesialrom, musikk/kuha/naturfag og mat og helse (er i dag i komb.med eit kl.rom) *Lærararbeidsplassar og kopirom *Uteområde med tilrettelegging for allsidig leik *Universell utforming *Grupperom og møterom
---	---

Denne lista viser at det på ingen måte er mogleg å gje elevane våre ei tilfredsstillande skuletilbod ved å gjera oppgraderingar innanfor ramma på 11 mill.

Trafikktilhøva rundt skulen er svært vanskelege, og farlege situasjonar er ein del av kvardagen vår. Dette omfattar både parkering, tilkomst, drop-sone og vare-levering. Vi kan ikkje på nokon måte halde fram med så farlege tilhøve for elevane ved Eikanger skule.

Vi ser at rådmannen ikkje kjenner til dei faktiske forholda på Eikanger skule, og det er til stor bekymring at de som folkevalde skal ta ei avgjerd i denne viktige saka på eit heilt sviktande grunnlag. Vi ønskjer i nær framtid å invitere dykk til eit informasjonsmøte på Eikanger skule for å få gje dykk eit nyansert og rett bilete av situasjonen for elevar og tilsette. Det er ikkje noko enkel løysing som gjer oss eit tilfredsstillande skuletilbod dei neste 10 åra. Vi reknar med at de som politikarar tek saka på alvor, ser på saka på nytt med dei rette brillene og tek det ansvaret de har som skuleeigar.

Eikanger 20.11.2017

Fau Eikanger skule